



Inier, domënia ai 25 de mà él gnü sughé la penultima partida de campionat de 3^a categoria sön le ciamp da La Val cuntra la scuadra da Prettau. Na bela prestaziun dla scuadra, che arjunj cun chësta bela devënta de 4 a 1 i 50 punç tla sajun 2013/14. Dô chësc fin dl'edma de campionat ti va ala scuadra da Rina de gran complimënç da pêrt dl U.S. La Val por la promoziun te 2^a categoria.

Les temperatöres cialdines à fat da cornîsc a chësc bel domisdé ia dala plaza dal sport “Plans” a La Val. Na bela partida plëna d’emoziuns, che à fat sperè fina ala fin de podëi ciamò arjunj le Rina al pröm post de tlassifica. La Val ne é nia plö buna de arjunj la scuadra a cé de tlassifica, le Rina davagna te ciasa cuntra le Niederdorf y se assigurëia insciö le titul cun 55 punç.

Sciöche secundo post de tlassamënt, pò La Val sughé les partides de dezijiun dô le campionat y crëi insciö ciamò tla promozion.



Al é la scuadra da La Val che à scialdi düta la partida tles mans. Da odëi él stè n grüm de ocajiuns da pêrt di sogadûs ladins, ci che à n pü mancé é stà i ultimi pasaji por rové a contluijun, scialdi massa lûnc o massa cûrc.

Bele da mët man dla partida é la scuadra ladina che fej n gran druch, al vëgn scialdi sughé tl mezciamp aversar cun le pal bâs. Menüt por menüt rüva i sogadûs trës plö dlungia porta, al ne pasa nia tröp che Alexander M. fej spo le pröm gol. Sön n bel cross de Micky abina le atacant le pal de cé y le indirizëia cuntra le palo lunch dla porta. N bel gol por Alexander, che porta le pröm gol dla partida. La medema ocajiun à ince Stefan püc menüç dedô. In chësc iade él indô Micky che deliziëia le centrocampist cun n bel cross, Stefan indêre sfiorëia le pal cun l'cé mo ne abina nia la porta. Ince Paolo Vallazza à süa ocajiun, indô sön na trata dal ciantun (da recordè sò bel gol cuntra la scuadra da Mühlwald). Al se posizionëia bun te area y abina le pal de pé , che rüva indêre sön le palo de porta.

I püc iadi che le Prettau devënta prigorîsc é scialdi sön les ripartenze, la defenjiun da La Val resta plö tôsc alta por dè sostëgn y continuité al atach y insciö é i aversars che é bugn de ti sciampè. Sepl fej bun so laûr y abina scialdi les trates sön porta. Le pröm di 3 goi de Micky te chësta partida toma al 35th, al ciafa le pal amesa l'area y cun n bel control deliziëiel le publich cun n bel palonët sura le verdaporta it, che ne rüva nia a devié fora le pal. 2 a 0 por La Val. Dan le pröm tëmp él ciamò da alzè fora na bela ocajiun de Alex E., al se fej inant da na pêrt jö y röia al limit dl'area, la bela trata röia de püch dlungia la palo lunch ia.

Les scuadres va a palsè sön le resultat de 2 a 0 por i ladins.

I sogadûs ciafa val coreziuns da pêrt dl'alenadù Floriani sön piceres dijatenziuns dl pröm tëmp y dal atra pêrt na gran carica por stlü jö la partida. Micky à fan de goi in chësta domenia, y bele do púc menüç dl mêt man dl secundo tëmp trasformëiel n önescmetri a gauja de n fal sön Alexander M.

Da spavënt sciode é i grüm de ultimi pasaji sciurà demez dai sogadûs, che pudess saurì gnì gestîs plö bun y che pudess ester dezisifs por rové a trà te porta. La luzidité ne dà nia dô, sön vigni pal vëgnel ciarè de antizipé l'aversar y de partì fora i pai ai compagns che che se infiltrëia jö por les fasces cuntra porta. Micky é un de chîsc y indô n iade pon fa sò inom sön n le cuarto gol. Le medemo tira na bela trata a 30 metri dala porta, sön chësc é ince Alexander M. che dà so contribut, al ti cûr la visuala al verdaporta che ne é nia bun de abiné le pal, la cogura röia bel plan dlungia le palo ite. 4 a 0 por La Val y tripléta de Micky.

Le gol dla bandira por Prettau toma spo atira dedô, al vëgn lascè crosè amez y I atacant lascè sù cun n bel stach, él bun de apogè le pal de cé te porta. Na gran dijatenziun che podô gnì evitada. Le centrocampist Felix N., apëna gnü te ciamp, fej ince gran parüda y davagna n grüm de "duei tl'aria", de cé ne ti la stica degun aversar. Chësc à ince süa gran ocajiun incö, süa trata da plö de 30 metri cuntra le set de porta vëgn de püch deviada sura fora dal verdaporta. Ti ultimi menüç él ciamò da arcordè val trates te porta da pêrt de trames scuadres, scialdi ruvades dlungia ia.

La partida se röia sön le 4 a 1 por La Val, in ocajiun dl'ultima partida te ćiasa él gnü fat festa cun düc i sostenidûs dla scuadra. A chisc ti va in primis n grandiscimo giulan por ester presënć a vigni partida. Vigni fin dl'edma é chësc sostëgn fondamental y ti da na gran motivaziun y forzes ai sogadûs. Giulan!

La Val süga söa ultima partida d campionat in domënia ai 01 de jügn dales 16:00 fora de

ćiasa sön le ćiamp a Vahrn cuntra la scuadra da Neustift.

Formaziun titolara: Sepl Kantioler, Marco Castlunger, Alex Alton, Paolo Vallazza, Elmar Valentin, Romeo Rubatscher, Max Nagler, Stefan Sottara, Alex Elzenbaumer, Micky Frenes y Alexander Miribung.

Alenadù: Floriani Claudio

Sostituziuns:

Martin Ploner gnü ite impede Elmar Valentin (60th menüt)

Felix Nagler gnü ite impede Stefan Sottara (70th menüt)

Werner Sottara gnü ite impede Paolo Vallazza (75th menüt)

Egon Frenes gnü ite impede Micky Frenes (80th menüt)

Por odëi i resultac dles atres partides drüca [RESULTAC](#)







Foto: Ester Elzenbaumer